



Bishita di Fundacion Cardioinfantil na Organo Ehecutivo AZV

RECIENTEMENTE Fundacion Cardioinfantil miho conoci como 'La Cardio' tabata di bishita na AZV pa conhuntamente haci un evaluacion di e desaroyo di asegurado cu a bay cerca nan pa haya tratamento. A discuti e.o. tratamento como pashent 'interna' of ambulatorio, duracion di estadia y cierto casonan specifico. Alabes a tene reunion cu nos departamento di facturacion y nos auditoria (na Colombia) pa discuti desafionan cu tin den e proceso di facturacion cu meta pa soluciona e retonan aki.

Otro momento importante di e bishita tabata ora cu a sinta cu e departamento encarga cu remision di asegurado pa La Cardio. Den tal reunion a papia tocante e colaboracion medico y logistico. Tambe a trece puntonan di mehoracion dilanti pa asina e cuido y experiencia di e asegurado y acompañaante mehora.



17 Di september 2025

Exhibicion di Women's Club of Aruba

Pa: Omaira Silva – Chairman di Comision di Historia & Preservacion 8 di september 2025

DIRECTIVA, comision di Historia & Preservacion, y miembronan di Women's Club of Aruba (WCA) cu orguyo ta presenta un exhibicion special marcando asina e comienso di nos di 91 aña di servicio na comunidad.

Durante e aña cu a pasa, di september 2024 te cu september 2025, nos a celebra nos di 90 aniversario cu un serie di evento memorabel, proyectonan, y recaudacion di fondo cu a haci nos miembrecia fuerte y a apoya nos comunidad. Cu e mesun entusiasmo y compromiso, nos ta embarca awo den e siguiente capitulo di nos biahe.

Bou di e liderazgo di chairman Omaira Silva, e comision di Historia & Preservacion a traha intensamente den e archivonan pa prepara e exhibicion aki. Aña pasa, riba 18 di september 2024, nos a presenta formalmente nos archivonan original (1934-1960) na Biblioteca Nacional Aruba, Departamento Arubiana/Caribiana. E exhibicion di e aña aki ta traha riba e fundeshi ey door di presenta nos archivonan fiscal y memorianan di cada presidente y su directiva,

y documentando hopi proyecto, actividad y evento di nos. E exhibicion aki no solamente ta refleha nos historia rico, pero ta sirbi tambe como un brug pa futuro, ora nos ta cuminsa cu nos di 91 aña.

E exhibicion lo habri oficialmente diaranson, 17 september 2025, pa 4:00p.m. Nos Miembro Honorario, Sra. Hanneke Boekhoudt, hunto cu nos Presidente, Sra. Reina Geerman, cu apoyo di Chairman y miembronan di e comision di Historia & Preservacion, lo dirigi e ceremonia.

Lo tene e exhibicion na Biblioteca Nacional Aruba, situa den George Madurostraat y ta keda habri pa publico regular di biblioteca di diahuebs, 18 di september te diabierna 19 di september.

Calurosamente nos ta invita tur miembro, ex-presidente, ex-miembro, amigo, famia, y publico en general pa bishita e exhibicion y descubri e legado, logronan, y futuro briyante di Women's Club of Aruba.